

Messadi

per la radunanza communal da decider tranter oter davart igls suandonts affars:

Stimadas votantas
Stimos votants

Igls 27 d'avost ò la radunanza communal da decider tranter oter davart igls suandonts affars:

Tractanda 3

Dumonda dalla Pendicularas Savognin SA agl cumegn da surpiglier ena garanzeia da max. 2 milliuns francs per en amprest NPR pertutgont la construcziun dalla telecabina nova da Savognin - Tigignas (ramplazzamaint dalla soptgera existenta)

La Pendicularas Savognin SA vign a ramplazzar la stad 2019 la soptgera existenta da Savognin a Tigignas cun ena telecabina da 10 nova. Las proceduras necessarias per la finanziaziun e las lubientschas èn neidas instradadas. Las investiziuns vignan a montar a radond 10 milliuns francs.

La radunanza communal digl cumegn da Surses digls 29 da matg ò concedia en amprest sainza tschains da 2 milliuns francs per la construcziun dalla telecabina. Aint igl frataimp on er la confederaziun ed igl cantun Grischun decidia da metter an vista allas pendicularas da Savognin en amprest sainza tschains da maximalmaintg 2 milliuns francs ed ena contribuziun unica à fonds perdu da radond 0.5 milliuns francs. Igl sustign succeda aint igl rom dalla nova politica regionala (NPR) dalla confederaziun. Pigl paiamaint digl amprest NPR dovrigl ena decisiun dalla regenza grischuna. Chella metta scu cundiziun, tg'igl cumegn surpeglia la garanzeia pigl amprest NPR da max. 2 milliuns francs. L'amortisaziun digl amprest ò da succeder an terma da 15 onns an transchas annualas identicas.

La competenza da conceder garanzeias schea tar la radunanza communal (art. 30 cefra 5 dalla costituziun communal).

La renovaziun dall'infrastructura existenta antras ena telecabina nova è da fitg gronda impurtanza per nosa regiun da vacanzas. I vign er menziuno tg'igls anteriours cumegns da Riom-Parsonz e da Savognin on surpiglia gio aint igl passo talas garanzeias. La Pendicularas Savognin SA è adegna neida siva a sias obligaziuns, uscheia tgi gl'è mai sto necessari da recorrer ad ena garanzeia.

Proposta dalla suprastanza communal:

La suprastanza propona alla radunanza communal da conceder la garanzeia pigl amprest NPR da max. 2 milliuns francs a favour dalla Pendicularas Savognin SA an connex cun la construcziun dalla telecabina nova da Savognin a Tigignas.

Tractanda 4:

Approvaziun dalla lescha davart igl provedimaint d'ava digl cumegn da Surses

An connex cun l'elaboraziun dalla lescha davart igl provedimaint d'ava è neida salvada igls 26 da favrer 2018 en'occorrenza d'infurmaziun publica e daverta siva ena consultaziun. Igl èn nias inoltros ples giaveischs e propostas, tgi èn per part nias risguardos ainten la lescha preschainta.

La lescha davart igl provedimaint d'ava vala pigl antier territori communal. Ella regla la furmaziun, igl adiever, igl mantignamaint, la renovaziun e la finanziaziun digls implants digl provedimaint d'ava digl cumegn scu er las relaziuns tranter igl cumegn e las proprietarias ed igls proprietaris d'implants privats tatgeas agl provedimaint d'ava digl cumegn.

Per cuvreur las expensas per la construcziun, igl menaschi, igl mantignamaint e la renovaziun digls implants digl provedimaint d'ava publics incassescha igl cumegn, sa basond agl dretg surordino, taxas tgi corvan igls costs e tgi risguardan igl prancepi digl caschunader.

Ainten tot igls bietgs ed implants tatgeas agl provedimaint d'ava on da neir installos chintaders d'ava tar l'antrada dalla lengia, an en li bagn accessibel. Igls chintaders d'ava vignan furnias digl cumegn e restan proprietad da tal. Igls costs per la montascha da nov digls chintaders d'ava von

a chint dallas proprietarias e digls proprietaris. L'installaziun digls chintaders d'ava ò da succeder anfignen igls 31 da december 2019.

Per tot igls bagns immobigliars tgi èn tatgeas ve digls implants digl provedimaint d'ava publics, ògl da neir paea ena taxa fundamentala tgi sa repeta mintg'onn scu er ena taxa tenor quantidad. Per basa da misiraziun dalla taxa fundamentala valan la valeta da nov digl bietg tatgea e las tariffas fixadas periodicamaintg dalla suprastanza communal ainfer igl rom da taxas tenor agiunta a chesta lescha. La taxa tenor quantidad vign incassada alla basa digl consum d'ava frestga tenor igl chintader d'ava e las tariffas an fr./m³ fixadas dalla suprastanza ainfer igl rom da taxas tenor agiunta a chesta lescha.

La taxa fundamentala incl. igl tschains pigl chintader on da cuvreur 60%, la taxa tenor quantidad 40% digls costs da menaschi digl provedimaint d'ava.

La lescha davart igl provedimaint d'ava aintra an vigour siva l'approvaziun dalla radunanza communal sen igl 1. da schaner 2019. Cun l'antrada an vigour vignan dissolveidas tottas leschas e determinaziuns davart igl provedimaint d'ava digls anteriours cumegn an Surses. Pigl incasso dallas taxas pigl onn 2019 valan las disposiziuns transitoricas tenor art. 36 dalla lescha preschainta.

Proposta dalla suprastanza communal:

La suprastanza propona alla radunanza communal d'approvar la lescha davart igl provedimaint d'ava e da la metter an vigour sen igl 1. da schaner 2019.

Tractanda 5:

Approvaziun dalla lescha davart la dismessa d'ava persa digl cumegn da Surses

An connex cun l'elaboraziun dalla lescha davart la dismessa d'ava persa è neida salvada igls 26 da favrer 2018 en'occurrènz d'infurmaziun publica e daverta siva ena consultaziun. Igl èn nias inoltros ples giaveischs e propostas, tgi èn per part nias risguardos ainten la lescha preschainta.

La lescha davart la dismessa d'ava persa vala pigl antier territori communal. Ella regla la furnaziun, igl adiever, igl mantignamaint, la renovaziun e la finanziaziun digls implants per ava persa scu er las relaziuns tranter igl cumegn e las proprietarias ed igls proprietaris da bagns immobigliars.

Sa basond agl dretg surordino corva igl cumegn las sias expensas per la construcziun, igl menaschi, igl mantignamaint e la renovaziun d'implants publics per l'ava persa cun taxas tgi corvan igls costs e tgi risguardan igl prancepi digl caschunader.

Per tot igls objects tgi èn tatgeas ve digls implants publics per ava persa, ògl da neir paea ena taxa fundamentala tgi sa repeta mintg'onn ed ena taxa tenor quantidad. La basa per la valetaziun dalla taxa fundamentala sa cumpona dalla valeta da nov digls bietgs tatgeas e dallas tariffas fixadas periodicamaintg dalla suprastanza communal ainfer igl rom da taxas tenor agiunta a chesta lescha. La taxa tenor quantidad, tgi stò neir paeda per tot igls bagns immobigliars tatgeas, vign calculada tenor igl consum d'ava frestga alla basa digl chintader d'ava e las tariffas an fr./m³ fixadas periodicamaintg dalla suprastanza ainfer igl rom da taxas tenor agiunta a chesta lescha.

La taxa fundamentala ò da cuvreur 60%, la taxa da quantidad 40% digls costs da menaschi digl tractamaint d'ava persa.

Per piglier ancunter e tractar ava persa e restanzas da bagns immobigliars betg tatgeas agls implants publics per ava persa, incassescha igl cumegn ena taxa tenor quantidad, tgi corva las expensas digl cumegn per igl tractamaint dall'ava persa inclus igls costs da preparaziun. La taxa vign incassada cun ena pauschala per m³. Chella fixescha la suprastanza ainfer igl rom da taxas tenor agiunta a chesta lescha.

La lescha davart la dismessa d'ava persa aintra an vigour siva l'approvaziun dalla radunanza communal sen igl 1. da schaner 2019. Cun l'antrada an vigour vignan dissolveidas tottas leschas e determinaziuns davart la dismessa d'ava persa digls anteriours cumegn an Surses. Pigl incasso dallas taxas pigl onn 2019 valan las disposiziuns transitoricas tenor art. 39 dalla lescha preschainta.

Proposta dalla supranza communal:

La supranza propona alla radunanza communal d'approvar la lescha davart la dismesa d'ava persa e da la metter an vigour sen igl 1. da schaner 2019.

Tractanda 6:

Approvaziun dalla lescha davart l'economia da rusment digl cumegn da Surses

An connex cun l'elaboraziun dalla lescha davart l'economia da rusment è neida salvada igls 26 da favrer 2018 en'occurrnza d'infurmaziun publica e davarta siva ena consultaziun. Igl èn nias inoltros ples giaveischs e propostas, tgi èn per part nias risguardos ainten la lescha preschainta.

La lescha davart l'economia da rusment vala pigl antier territori communal. Ella regla la furnaziun, igl adiever, igl mantignamaint, la renovaziun e la finanziaziun da posts da rimnada ed implants da rusments sen igl territori digl cumegn, schinavant tg'igl cumegn è cumpetent persiva.

Sa basond agl dretg surordino corva igl cumegn igls sies costs per economisar igls rusments cun incassar taxas da rusment tgi sa cumponan da taxas fundamentalas e da taxas tenor quantidad tgi corvan igls costs e tgi risguardan igl prancepi digl caschunader.

Per edifezis tgi cuntignan abitaziuns, abitaziuns da vacanzas e lis da lavour u menaschis da produziun u tar igls quals i sa resultan regularmaintg rusments, ègl da paer ena taxa fundamentala periodica annuala. La basa per la valetaziun dalla taxa fundamentala sa cumpona dalla valeta da nov digl bietg e dallas tariffas fixadas periodicamaintg dalla supranza communal ainfer igl rom da taxas tenor agiunta a chesta lescha.

Las taxas tenor quantidad vignan incassadas per rusment e marcanzeia massitscha an furma da taxas per satgs e containers. Ellas vignan paedas cun la compra digls satgs e digls chips per containers. L'otezza dallas diversas tariffas fixescha la supranza periodicamaintg ainfer igl rom da taxas tenor agiunta a chesta lescha.

La taxa fundamentala ò da cuvreur 60%, la taxa da quantidad 40% digls costs da menaschi dall'economisaziun da rusment.

La lescha davart l'economia da rusment aintra an vigour siva l'approvaziun dalla radunanza communal sen igl 1. da schaner 2019. Cun l'antrada an vigour vignan dissolveidas tottas leschas e determinaziuns davart l'economia da rusment digls anteriours cumegns an Surses.

Proposta dalla supranza communal:


La supranza propona alla radunanza communal d'approvar la lescha davart l'economia da rusment e da la metter an vigour sen igl 1. da schaner 2019.

Tinizong, den 7. August 2018

Per la supranza communal Surses:



Leo Thomann
mastral



Beat Jenal
canzlist